

[Augsburg], 18. September 1556

An Johannes Oporinus

UB Basel, Fr. Gr. I 11, fol. 198r.

Steinmann Nr. 691.

Lit. Husner S. 150; Steinmann S. 55.

S. P. D. Literas tuas Francofordianas hodie demum accepi. Cuius culpa nescio. Zonarae tomum tertium te accepisse gaudeo. literas quibus copiose de toto isto Monachico negocio tecum egi, an acceperis, ex responso tuo non intelligo. Ita enim rescribis, quasi plane nihil tibi scrispissem. qui casus ne vtrique nostrum incommodarit, vereor. ἀλλὰ τὰ μὲν προτετύχθαι ἔάσομεν. Res in eo nunc versatur. D. Anto[nius] Fuggerus pollicetur 50 f. honorariae pecuniae. 300 mutuae. ea condicione vt totum Zonaram ad Cal[endas] Martias anni 1557. absoluas, et 300 f. tribus proximis nondinis soluas, centenos vernis, totidem autumnalibus anni 1557. et reliquos 100 vernis anni 1558. haec conditio si placet, syngrapham huc mittes in hanc sententiam quod ad solutionem attinet, vnaque promittes, te chartam bonam et iustae magnitudinis cuiusmodi est Nicephori, et charactere tam graeco quam Latino, qui talem chartam deceat, vsurum, et graeca latinaque e regione coniuncturum siue integris folijs, siue per columnas, vtrum tibi fuerit accommodatus. Syngrapha tali huc missa, qua et tempus editionis et solutionis et forma operis contineatur, statim recipies syngrapham, qua a Prechteris Argentinensibus florini 350 tibi numerabuntur, vnaque tomum primum, quem intra dies 14 deo fortunante absoluam. Accipies et medium, vti spero, ante Cal[endas] Nouembbris, vt te 2 aut 3 prelis imprimere nihil sit prohibitum. Membranaceos codices D. Anto[nius] non cupid. si 24 exempla in charta scriptoria miseris, abunde illi satisficeris, modò ne quid in pactis et conuentis desideretur. Habebimus enim morosos indices, qui ne iam ante et me et te et totum opus calumniati sint vereor. Sed calumnias et inuidiam, ἀν θεὸς ἐθέλη, cum laude nostra refutabimus, et Mecaenatem ipsum, vbi opus apparuerit, et magis propitium, et fortasse liberaliorem experiemur. Vtut ceciderit, officio certè nostro fungemur. Vale. 18 Sept[embris] Anno 1556.

Hiero[nymus] Wolfius.